

四庫全書

子部

欽定四庫全書

說郭卷五十二上

元 陶宗儀 撰

明皇十七事序

太和八年秋八月乙酉上於紫宸殿聽政宰臣涯以下
奉職事上顧謂宰臣曰故內臣高力士終始事迹試為
言之臣涯謹奏云上元中史臣柳芳得罪竄黔中時力
士亦從事巫州因與周旋力士以芳嘗司史為芳言先
時禁中事皆芳所不能知而芳亦有質疑者芳默識之

及還編次其口語號曰問高力士說上曰令訪史氏取其
事書之臣涯等既奉詔乃詣芳孫度支員外璟詢事
璟曰某祖芳前從力士問覲縷未竟復著唐厯採撫義
類尤相近者以傳之其餘或秘不敢宣或怪竒非編錄
所宜及者不以傳今按求其書亡失臣德裕亡父先臣
與芳子吏部郎冕貞元初俱為尚書郎後謫官俱東出
道相與語遂及高力士說且曰彼皆目覩非出傳聞信
而有徵可為實錄先臣每為臣言之臣伏念所憶授凡

有十七事歲祀久更遺稿不傳臣德裕非黃瓊之練習
愧史遷之該博唯次舊聞懼失其傳不足以備大君之
問謹錄如左以補史官之缺云

欽定四庫全書

卷五十二上

明皇十七事

李德裕

玄宗之在東宮為太平公主所忌朝夕伺察纖微聞於上而宮闈左右亦潛執兩端以附太平之勢時元獻皇后得幸方娠玄宗懼太平之忌欲令服藥除之而無可語者張說以侍讀得進太子宫中玄宗從容謀及說說贊其事他日說又有事入侍因懷去胎藥三劑以獻玄宗得其藥喜盡出左右默搆火殿中煮未及熟怠而假寢影響之際有神人長丈餘身披金甲操戈繞藥三匝

藥盡覆而無遺焉玄宗起視異之復增火又投一劑煑於鼎中因就榻瞬目以候之而神復見覆藥如初凡三煑皆覆乃止明日說又至因告其詳說降階拜賀曰天所命也不可去之厥後元獻皇后思食酸玄宗以告說說因進經輒袖木瓜以獻故開元中恩澤莫能及肅宗之與說子均垧若親戚兄弟云芳本張說所引說嘗自陳述與力士詞協也

玄宗初即位禮貌大臣賓禮故老注意於姚崇宋璟引

見便殿皆為之興起去輒臨軒以送其他宰臣優寵莫及至李林甫以宗室近屬上所拔用恩意甚厚而禮遇漸輕姚崇為相嘗於上前請序進郎吏上顧視殿宇不答崇再三言之冀上少酬而卒不對崇益恐趨出高力士奏曰陛下初承鴻業即當面言可否而崇言之陛下不視臣恐宰臣必大懼上曰朕既任崇為相政事之大者當日奏朕與共決之如郎署吏秩甚卑獨不能決而重煩吾耶崇至中書方悸不自安會力士宣事因為言

上意崇且解且喜朝廷聞者皆以上有人君大度得任相之道焉

魏知古起家諸吏為姚崇引用及同升也崇頗輕之無何請知古攝吏部尚書宋璟門下過官知古心啣之思有以中之者時崇二子分曹洛邑會知古至恃其家君頗招致請託知古歸悉以聞上他日上召崇從容謂曰卿子才乎皆何官也崇揣知上意因奏曰臣有三子兩人皆分司東郡矣其為人欲而寡慎是必以事干知古

然臣未及問之耳上始以丞相子重言之欲微動崇而
意崇私其子或為之隱及聞崇所奏大喜且曰卿安從
知之崇曰知古微時是臣之尉薦以至榮達臣之子愚
謂知古見德必容其非故必干之上於是明崇不私其
子之過而薄知古之負崇也上欲斥之崇為之請曰臣
有子無狀撓陛下法陛下原之臣幸大矣而由臣遂知
古海內臣庶必以陛下為私臣矣非所以補元化也上
久乃許之翌日以知古為工部尚書罷知政事

源乾曜以奏事稱旨上悅之於是驟拔用歷戶部侍郎京兆尹以至宰相異日上獨與力士語曰爾知吾拔用乾曜之速乎力士曰不知也上曰吾以其容貌言語類蕭至忠故用之力士曰至忠不嘗負陛下乎陛下何念之深也上曰至忠晚乃謬悞耳其初立朝得不為賢相乎上之愛才宥過聞者無不歎

蕭嵩為相引韓休為同列及休相稍與不協嵩因乞骸骨上慰嵩曰朕未厭卿卿何庸去嵩俯伏曰臣待罪相

府爵位已極陛下未厭臣臣得以乞身如陛下厭臣臣首領之不保又安得自遂因隕涕上為之改容曰卿言切矣朕思之未決卿第歸至夕當有處無使至旦宜如常朝謁也及日暮命力士詔嵩曰朕惜卿欲固留卿而君臣始終貴全大義亦國家美事也今除卿右丞相是日荊州始進甘子上以素羅包二枚以賜之

玄宗好神仙往往詔郡國徵奇士有張果者則天時聞其名不能致上亟召之乃與使偕至其所為變怪不測

又有邢和璞者善算星術視人投算而能究知善惡天
壽上使算果惛然莫知其甲子又有師夜光者善視鬼
後召果與坐密令夜光視之夜光進曰果今安在願得
見之而果坐於上前久矣夜光終莫能見上謂力士曰
吾聞奇士至人外物不能敗其中試飲以薑汁不死者
乃奇士也會天寒甚乃使以汁進果果遂飲盡二卮醇
然如醉者顧曰非佳酒也乃寢頃之取鏡視其齒已盡
焦且黧矣命左右取鍤如意以擊齒盡墮而藏之於袋

乃懷中出神藥色微紅傳於墮齒中復寢久之視鏡齒皆生矣而粲然潔白上乃信其不誣矣

玄宗嘗幸東都天大旱且暑時聖善寺有天竺乾僧無畏號三藏善召龍致雨之術上遣力士疾召無畏奏旱數當耳召龍興雲烈風迅雷適足以暴物不可為也上強之又曰苦暑人病矣雖暴風疾雷亦足快意無畏不得已乃奉詔有司為陳請雨具而幡幢像設甚備無畏笑曰斯不足致雨悉令徹之獨盛一鉢水以刀攪旋之胡

言數百呿水須臾有若龍狀其大類指赤色首噉水上
俄復沒於鉢中無畏復以刀攪水呿者三頃之白氣自
鉢中興如爐烟直上數尺稍引出講堂外無畏謂力士
曰宜去雨至矣力士極馳而去還顧見白氣疾旋自講
堂出若一疋素練者既而昏霾大風震雷以雨力士纔
及天津橋之南風亦隨馬而至矣衢中大樹多拔力士
比復秦衣盡霑濕時孟溫禮為河南尹目覩其事溫禮
子暉嘗言于臣亡祖先臣與力士言同後吏部員外郎

李華撰無畏碑亦云奉詔致雨滅火返風昭昭然徧於耳目也今洛京天津橋有荷澤寺者即高力士去請呪水祈雨回至此寺前雨大降明皇因於此地造寺而名荷澤焉寺今見在

玄宗善八分書凡命相皆先以御筆書其名置案上會太子入侍上舉金甌覆其名以告之曰此宰相名也汝庸知其誰也即射中賜爾卮酒肅宗拜而稱曰非琳與從愿乎上曰然因舉甌以示之乃賜卮酒是時琳與從

愿皆有宰相望玄宗將倚為相者數矣竟以宗族繁盛慮附託者衆卒不用

肅宗在東宮為李林甫所搆幾危者數矣無何鬚髮斑白常早朝上見之愀然曰汝第歸院吾當幸汝矣上至見宮中庭宇不灑掃而樂器久屏塵埃積其間左右使

用無有妓女上為之動色顧謂力士曰太子居處如此

將軍盍使我聞之乎

上在禁中不名力士呼為將軍

力士奏曰臣嘗欲

上言太子不許云無動上念即詔力士下京兆尹亟選

民間女子頗長潔白者五人將以賜太子力士趨出庭下復還奏曰臣他日嘗宣旨京兆閱致女子人間囁囁然而朝廷好言事者得以為口實臣以為掖庭中故衣冠以事沒其家者宜可備選上太悅使力士召掖庭令按籍閱視得三人乃以賜太子而章敬皇后在選中頃者后侍寢魔不悟吟呼若有疾痛氣不屬者肅宗呼之不解竊自計曰上始賜我卒無狀不寤上安知非吾護視不謹耶遽秉燭視之良久方寤肅宗問之后手掩其左

脇曰妾向夢中有神人長丈餘介金操劍謂妾曰吾與汝作子自左脇以劍抉而入腹痛殆不可忍及今未之已也肅宗驗之於燭下若有縫而赤者存焉遽以狀聞遂生代宗吳操嘗言於先臣與力士所說亦同代宗之誕三日上幸東宮賜之金盒以浴吳后年幼體弱皇孫體未舒負媼惶惑乃以宮中同日生而體貌豐碩者以進上視之不樂曰此非吾兒負媼叩頭具服上昵謂曰非爾所知取吾兒來於是以太子之子進見上大喜置

諸掌內視之笑曰此兒福祿過其父及上起身還宮進內謂力士曰此一殿有三天子樂乎哉可以勸太子飲酒吳秦嘗言於先臣與力士言亦同

肅宗為太子時嘗侍膳尚食置熟俎有羊臂臠上顧使太子割肅宗既割餘汚漫在刀取餅潔之上熟視不憚肅宗徐舉餅啖之上甚悅謂太子曰福當如此愛惜

天寶中安祿山每來朝上特異待之每為致殊禮殿西偏張金鷄障其下來乃賜坐肅宗曰天子殿無人臣坐

禮陛下寵之過厚必將驕也上呼太子前曰此胡有奇相吾以此厭弭之爾

興慶宮上潛龍之地即聖厯初五王宅也上性友愛及即位立樓于宮之西南垣署曰花萼相輝朝退亟與諸王遊或置酒為樂時天下無事號太平者垂五十年及祿山犯闕乘傳遽以告上欲遷幸復登樓置酒四顧悽愴乃命奏玉環玉環者睿宗所御琵琶也異時上張樂宮中歌舞嘗置之榻以黃帕覆之不以雜他樂器而未

嘗持用至是使樂工賀懷智取調之又命禪定寺僧殷
師彈之時美人善歌從者三人使其中一人歌水調畢
奏上將去復留眷眷因使視樓下工歌有善水調者乎
一少年心悟上意自言工歌兼善水調使之登樓且歌
歌曰山川滿目淚霑衣富貴榮華能幾時不見只今汾
水上惟有年年秋鴈飛上聞之潛然淚出顧侍者曰誰
為此詞或對曰宰相李嶠上曰李嶠真才子也不待曲
終而去

玄宗西幸車駕自延英門出楊國忠請由左藏庫而去從之望見千餘人持火炬以候上駐蹕曰何用此為國忠對曰請焚庫積無為盜守上歛容曰盜至若不得此當歛於民不如與之無重困吾赤子也命撤火炬而後行聞者皆感激流涕迭相謂曰吾君愛民如此福未艾也雖太王去豳何以過此乎

玄宗始入斜谷也早烟霞甚晦知頓使韋倜於野中得新熟酒一壺跪獻於馬首者數四上不為之舉倜懼乃

注以他器引滿於前上曰卿以我為疑耶始吾御宇之初嘗飲大醉損一人吾悼之因以為戒迄今四十餘年未嘗甘酒指力士及近侍曰此輩皆知之非給卿也從臣聞之無不感悅上孜孜儆戒也如是富有天下五十載豈由斯道乎

天寶中興慶池小龍嘗出游宮垣南溝水中蜿蜒竒狀靡不瞻覩及鑿興西幸一夕乘雲雨自池中望西南而去上至嘉陵江將乘舟有龍翼舟而進上泣然流涕顧

謂左右曰此吾興慶池中龍也命以酒沃酹之於是龍振甲而登天

玄宗於諸昆季友愛彌篤呼寧王為大哥每與諸王同食因食之次寧王錯喉噴上髭王驚慚不遑上顧其悚悚欲安之黃幡綽曰不是錯喉上問何也對曰是噴帝上大悅

玄宗遽播遷於蜀百官諸司多不知之有陷在賊中者為祿山所脇從而黃幡綽亦在其數得出入左右及收

復賊黨就擒幡綽被拘至行在上素憐其敏捷釋之有
毀於上前曰黃幡綽在賊中與大逆圓夢皆順其情而
忘陛下積年之恩寵祿山夢見衣袖長至階下幡綽曰
當垂衣而治祿山夢見殿中梟子倒幡綽曰革故鼎新
推之多類此也幡綽曰臣實不知陛下大駕蒙塵赴蜀
既陷在賊中寧不苟悅其心以脫一時之命今日得再
見天顏因與大逆圓夢必知其不可也上曰何以知之
對曰逆賊夢袖長是出手不得也又夢梟子倒者是胡

不得也以此臣故先知之上大笑而止

開元天寶遺事

王仁裕

玉有太平字

開元元年中因雨過地潤微裂至夜有光宿衛者記其處所曉乃奏之上令鑿其地得寶玉一片如拍板樣上有古篆天下太平字百僚稱賀收之內庫

步輦召學士

明皇在便殿甚思姚元崇論時務七月十五日苦雨不止泥濘盈尺上令侍御者擡步輦召學士來時元崇為

翰林學士中外榮之自古急賢待士帝王如此者未之有也

賜筴表直

宋璟為宰相朝野人心歸美焉時春御宴帝以所用金筴令內臣賜璟雖受所賜莫知其由未敢陳謝帝曰所賜之物非賜汝金蓋賜卿之筴表卿之直也璟遂下殿拜謝

截鐙留鞭

姚元崇初牧荊州三年受代日闔境民吏泣擁馬首遮
道不使去所乘之馬鞭鐙民皆截留之以表瞻戀新牧
具其事奏之褒詔美焉就賜中金一千兩

慙顏厚如甲

進士楊光遠惟多矯飾不識忌諱遊謁王公之門干索
權豪之族未嘗自足稍有不從便多誹謗常遭有勢挺
辱畧無改悔時人多鄙之皆曰楊光遠慙顏厚如十重
鐵甲也

七寶山座

明皇於勤政樓以七寶裝成山座高七尺召諸學士講議經旨及時務勝者得升焉惟張九齡論辨風生升此座餘人不可階也時論美之

癡賢

右拾遺張方回精神不爽時人呼為癡漢子每朝政有失便抗疏論之精彩昂然進不懼死明皇常謂右拾遺張方回忠賢人也

蜂蝶相隨

都中名姬楚蓮香者國色無雙時貴門子弟爭相詣之蓮香每出處之間則蜂蝶相隨蓋慕其香也

掃雪迎賓

巨豪王元寶每至冬月大雪之際令僕夫自本家坊巷口掃雪為徑路躬親立於坊巷前迎揖賓客就本家具酒炙宴樂之為暖寒之會

夢虎之妖

周象者好畋獵後為汾陽令忽夢一乳虎相逼驚而睡覺因茲染疾後有僧海寧者因過象門謂隣叟曰此居有妖氣久則不可救也隣叟遂聞於象象召僧令視之僧曰當與君禳之遂擇日設壇持劔禹步誦呪自大門而入至於寢所繞患人數徧而叱之忽於牀下作一虎聲家人悉驚奔散周象亦不覺投牀下伏死於地僧以水噉之須臾如故

記事珠

開元中張說為宰相有人惠說一珠紺色有光名曰記
事珠或有闕忘之事則以手持弄此珠便覺心神開悟
事無巨細渙然明曉一無所忘說祕而至寶也

遊仙枕

龜茲國進奉枕一枚其色如瑪瑙溫溫如玉其製作甚
樸素若枕之則十洲三島四海五湖盡在夢中所見帝
因立名為遊仙枕後賜與楊國忠

隨蝶所幸

開元末明皇每至春時旦暮宴於宮中使嬪妃輩爭插
艷花帝親捉粉蝶放之隨蝶所止幸之後因楊妃專寵
遂不復此戲也

記惡碑

盧真累任大郡皆顯治聲所至之處畏如神明或有無
良惡跡之人必行嚴斷仍以所犯之罪刻石立本人門
首再犯處於極刑民間畏懼絕無犯法者明皇知其能
官賜中金五千兩璽詔褒諭焉故民間呼其石為記惡

碑

自暖盃

內庫有一酒盃青色而有紋如亂絲其薄如紙於盃足上有縷金字名曰自暖盃上令取酒注之溫溫然有氣相次如沸湯遂收於內藏

辟寒犀

開元二年冬至交趾國進犀一株色黃如金使者請以金盤置於殿中溫溫然有暖氣襲人上問其故使者對

曰此辟寒犀也頃自隋文帝時本國曾進一株直至今日上甚悅厚賜之

傳書鵠

張九齡少年時家養羣鵠每與親知書信往來只以書繫鵠足上依所致之處飛往投之九齡目之為飛奴時人無不愛訝

牽紅絲娶婦

郭元振少時美風姿有才藝宰相張嘉貞欲納為婿元

振曰知公門下有女五人未知孰陋事不可倉卒更待
忖之張曰吾女各有姿色即不知誰是匹偶以子風骨
奇秀非常人也吾欲令五女各持一絲幔前使子取便
牽之得者為婿元振欣然從命遂牽一紅絲線得第三
女大有姿色後果然隨夫貴達也

豪友

長安富民王元寶楊崇義郭萬金等國中巨豪也各以
延納四方多士競於供送朝之名寮往往出於門下每

科場文士集於數家時人目之為豪友

喚鐵

太白山有隱士郭休字退夫有運氣絕粒之術於山中
建茅屋百餘間有白雲亭鍊丹洞注易亭修真亭朝立
壇集神閣每於白雲亭與賓客看山禽野獸即以槌擊
一鐵片子其聲清響山中鳥獸聞之集於亭下呼為喚
鐵

鸚鵡告事

長安城中有豪民楊崇義者家富數世服玩之屬僭於王公崇義妻劉氏有國色與隣舍兒李奔私通情甚於夫遂有意欲害崇義忽一日醉歸寢於室中劉氏與李奔同謀而害之埋於枯井中其時僕妾輩並無所覺惟有鸚鵡一隻在堂前架上泊殺崇義之後其妻却令童僕四散尋覓其夫遂經府陳詞言其夫不歸竊慮為人所害府縣官吏日夜捕賊涉疑之人及童僕輩經拷捶者百數人莫究其弊後來縣官等再詣崇義家檢校其

架上鸚鵡忽然聲屈縣官遂取於臂上因問其故鸚鵡
曰殺家主者劉氏李弇也官吏等遂執縛劉氏及捕李
弇下獄備招情款府尹具事案奏聞明皇歎訝久之其
劉氏李弇依刑處死封鸚鵡為綠衣使者付後宮養餵
張說後為綠衣使者傳好事者傳之

瑞炭

西涼國進炭百條各長尺餘其炭青色堅硬如鐵名之
曰瑞炭燒於爐中無焰而有光每條可燒十日其熱氣

迫人而不可近也

敲冰煮茗

逸人王休居太白山下日與僧道異人往還每至冬時取溪冰敲其精瑩者煮建茗共賓客飲之

物外之遊

王休高尚不親勢利常與名僧數人或跨驢或騎牛尋訪山水自謂結物外之遊

花妖

初有木芍藥植於沉香亭前其花一日忽開一枝兩頭朝則深紅午則深碧暮則深黃夜則粉白晝夜之內香艷各異帝謂左右曰此花木之妖不足訝也

花上金鈴

天寶初寧王日侍好聲樂風流蘊藉諸王弗如也至春時於後園中紉紅絲為繩密綴金鈴繫於花梢之上每有烏鵲翔集則令園吏掣鈴索以驚之蓋惜花之故也諸宮皆效之

七寶硯鑪

內庫中有七寶硯鑪一所曲盡其巧每至冬寒硯凍置於鑪上硯冰自消不勞置火冬月帝常用之

妖燭

寧王好聲色有人獻燭百炬似蠟而膩似脂而硬不知何物所造也每至夜筵賓妓間坐酒酣作狂其燭則昏昏然如物所掩罷則復明矣莫測其怪也

夢玉鶯投懷

張說母夢有一玉鶯自東南飛來投入懷中而有孕生說果為宰相其至貴之祥也

饒魚燈

南中有魚肉少而脂多彼中人取魚脂煉為油或將照紡織機杼則暗而不明或使照筵宴造飲食則分外光明時人號為饒魚燈

助嬌花

御苑新有千葉桃花帝親折一枝挿於妃子寶冠上曰

此箇花尤能助嬌態也

照病鏡

葉法善有一鐵鏡鑑物如冰人每有疾病以鏡照之盡見臟腑中所滯之物後以藥療之竟至痊瘥

助情花

明皇正寵妃子不視朝政安祿山初承聖睨因進助情花香百粒大小如粳米而色紅每當寢處之際則含香一粒助情發興筋力不倦帝祕之曰此亦漢之慎卹膠

也

眼色媚人

念奴者有姿色善歌唱未嘗一日離帝左右每執板當
席顧眄帝謂妃子曰此女妖麗眼色媚人每轉聲歌喉
則聲出於朝霞之上雖鐘鼓笙竽嘈雜而莫能遏宮妓
中帝之鍾愛也

警惡刀

貴妃父楊玄琰少時嘗有一刀每出入於道途間多佩

此刀或前有惡獸盜賊則所佩之刀鏗然有聲似警於人也玄琬寶之人也

夢中有孕

楊國忠出使於江浙其妻思念至深荏苒成疾忽晝夢與國忠交因而有孕後生男名肅洎至國忠使歸其妻具述夢中之事國忠曰此蓋夫妻相念情感所致時人無不譏誚也

金籠蟋蟀

每至秋時宮中妃妾輩皆以小金籠捉蟋蟀閉於籠中置之枕函畔夜聽其聲庶民之家皆效之也

燭奴

申王亦務奢侈蓋時使之然每夜宮中與諸王貴戚聚宴以龍檀木彫成燭趺童子衣以綠衣袍繫之束帶使執畫燭列立於宴席之側目為燭奴諸官貴戚之家皆效之

醒醉草

興慶池南岸有草數叢葉紫而心殷有一人醉過於草
傍不覺失其酒態後有醉者摘草嗅之立時醒悟故目
為醒醉草

盆池魚

明皇以李林甫為相後因召張九齡問可否九齡曰宰
相之職四海具瞻若任人不當則國受其殃只如林甫
為相然寵擢出宸衷臣恐他日之後禍延宗社帝意不
悅忽一日帝曲宴近臣於禁苑中帝指示於九齡林甫

曰檻前盆池中所養魚數頭鮮活可愛林甫曰賴陛下
恩波所養九齡曰盆池之魚猶陛下任人他但能裝景
致助兒女之戲爾帝甚不悅時人皆美九齡之忠直

看花馬

長安俠少每至春時結朋聯黨各置矮馬飾以錦韉金
鞵並轡於花樹下往來使僕從執酒皿而隨之遇好園
則駐馬而飲

香肌暖手

岐王少惑女色每至冬夜手冷不近於火惟於妙妓懷中揣其肌膚稱為暖手常日如是

金衣公子

明皇每於禁苑中見黃鶯常呼之為金衣公子

花裯

學士許慎選放曠不拘小節多與親友結宴於花園中未嘗具帷幄設坐具使童僕輩聚落花鋪於坐下慎選曰吾自有花裯何銷坐具

銷恨花

明皇於禁苑中初有千葉桃盛開帝與貴妃日逐宴於樹下帝曰不獨萱草忘憂此花亦能銷恨

醉興

申王每醉即使宮妓將錦綵結一氍毹子令宮妓輩擡昇歸寢室本宮呼曰醉興

妓圍

申王每至冬月有風雪苦寒之際使宮妓密圍於坐側

以禦寒氣自呼為妓圍

風流藪澤

長安有平康坊妓女所居之地京都俠少萃集于此兼
每年新進士以紅牋名紙遊謁其中時人謂此坊為風
流藪澤

依冰山

楊國忠權傾天下四方之士爭詣其門進士張象者陝
州人也方學有大名志氣高大未嘗低折於人人有勸

象令修謁國忠可圖顯榮象曰爾輩以謂楊公之勢倚
靠如泰山以吾所見乃冰山也或皎日大明之際則此
山當誤人爾後果如其言時人美張生見幾後年張生
及第釋褐授華陰尉時縣令太守俱非其人多行不法
張生有吏道勤於政事每中舉一事則太守令尹抑而
不從張生曰大丈夫有凌霄蓋世之志而拘於下位若
立身於矮屋中使人擡頭不得遂拂衣長往歸遯於嵩
山

禽擁行車

李元紘開元初為好時令賦役平允不嚴而治大有政聲遷潤州司馬發離百里士民號泣遮路烏鵲之類飛擁行車有詔褒美之

鏡影成相字

宋璟未第時因於日中覽鏡鏡影忽成相字璟因此自負遂修相業後如其志

知更雀

裴耀卿勤於王政夜看案牘晝決獄訟常養一雀每夜至初更時有聲至五更時急鳴耀卿呼為知更雀又于廳前有一大桐樹至曉則有羣鳥翔集以此為出廳之候故呼為報曉鳥時人美焉

枯松再生

明皇遭祿山之亂鑾輿西幸禁有枯松復生枝葉蔥蒨宛若新植者後肅宗平內難重興唐祚枯松再生祥不誣矣

顛飲

長安進士鄭愚劉參郭保衡王冲張道隱等十數輩不
拘禮節旁若無人每春時選妖妓三五人乘小犢車詣
名園曲沼藉草裸形去其中帽呌笑喧呼自謂之顛
飲

選婿窻

李林甫有女六人各有姿色雨露之家求之不允林甫
廳事壁間開一橫窻飾以雜寶縵以絳紗常日使六女

戲於憲下每有貴族子弟入謁林甫即使女於憲中自
選可意者事之

四方神事

姚元崇為宰相憂國如家愛民如子未嘗私於喜怒惟
以忠孝為意四方之民皆畫元崇之真神事焉求之有
福

立有禍福

盧真為陝州刺史嚴毅之聲聞於關內玄宗幸京師次

陝城頗知真有神政御筆贊於廳事曰專城之重分陝之雄仁雖惠愛性實謙冲亦既利物存乎匪躬斯為國寶不隊家風尋除兵部侍郎陝州之民多有淫祀者州之士民相語曰不須賽神明不必求巫祝爾莫犯盧公立便有禍福

移春檻

楊國忠子弟每春至之時求名花異木植於檻中以板為底以木為輪使人牽之自轉所至之處檻在目前而

便即歡賞目之為移春檻

冰山避暑

楊氏子弟每至伏中取大冰使匠琢為山周圍於宴席間座客雖酒酣而各有寒色亦有挾纈者其驕貴如此也

戲擲金錢

內庭嬪妃每至春時各於禁中結伴三人至五人擲金錢為戲蓋孤悶無所遣也

射團

官中每到端午節造粉團角黍貯於金盤中以小角造
弓子纖妙可愛架箭射盤中粉團中者得食蓋粉團滑
膩而難射也都中盛於此戲

探官

都中每至正月十五日造麵饘以官位帖子卜官位高
下或賭筵宴以為戲笑

撤去燈燭

蘇頲與李入對掌文誥玄宗顧念之深也八月十五夜於禁中直宿諸學士翫月備文酒之宴時長天無雲月色如晝蘇曰清光可愛何用燈燭遂使撤去

刀槍自鳴

武庫中刀槍自鳴識者以為不祥之兆後果有祿山之亂大駕西幸之應也

富窟

王元寶都中巨豪也常以金銀疊為屋壁上以紅泥泥之於

宅中置一禮賢堂以沉檀為軒檻以硃硃甃地面以錦
文石為柱礎又以銅線穿錢甃於後園花徑中貴其泥
雨不滑也四方賓客所至如歸故時人呼為王家富窟

牀畔香童

元寶好賓客務於華侈器玩服用僭於王公而四方之
士盡歸而仰焉常於寢帳牀前雕矮童二人捧七寶博
山爐自暝焚香徹曉其驕貴如此

龍皮扇

元寶家有一皮扇子製作甚質每暑月宴客即以此扇子置於坐前使新水灑之則颯然風生巡酒之間客有寒色遂命徹去明皇亦嘗差中使去取看愛而不受帝曰此龍皮扇子也

夢筆頭生花

李太白少時夢所用之筆頭上生花後天才瞻逸名聞天下

醒酒花

明皇與貴妃幸華清宮因宿酒初醒凭妃子肩同看木

芍藥上親折一枝與妃子遞嗅其艷帝曰不惟萱草忘憂此花香艷尤能醒酒

蛛絲卜巧

帝與貴妃每至七月七日夜在華清宮遊宴時宮女輩陳瓜果酒饌列於庭中求恩於牽牛織女星也又各捉蜘蛛於小合中至曉開視蛛網稀密以為得巧之候密者言巧多稀者言巧少民間亦效之

夜明杖

隱士郭休有一拄杖色如朱染叩之則有聲每出處遇夜則此杖有光可照十步之內登危陟險未嘗足失則杖之力焉

郡神迎路

張開為荊州刺史至郡界風雨暝晦不辨面目唯聞空中有殿喝之聲相次雲中有衣紫披甲冑者十數人開問其故對曰某荊州內外所主之神久仰使君令名故相率迎引到任謁廟後各致謝及建飾廟貌自此政譽

尤善也

縣妖破膽

李杲遷洛陽令嚴刑峻法民吏畏服縣之積弊杲盡革之踰月之中縣務清簡時有進士劉兼赴舉上都舍於村邸至夜中聞戶外街衢中有數人相語曰李令今古正人也吾輩見其行事威猛令人破膽此中不可久居宜遷於他邑可求血食也兼訝其事遂啓門視之寂無影響方知乃邑之妖神也兼遂書贊一首於村邸之壁

云校吏畏威縣妖破膽好錄政聲聞於御覽後明皇旌其能賜金百兩及章服焉

泥金帖子

新進士才及第以泥金書帖子附家書中用報登科之喜至文宗朝遂寢削此儀也

喜信

新進士每及第以泥金書帖子附於家書中至鄉曲親戚例以聲樂相慶謂之喜信也

被底鴛鴦

五月五日明皇避暑遊興慶池與妃子晝寢於水殿中
宮嬪輩凭欄倚檻爭看雌雄二鷗鷖戲於水中帝時擁
貴妃於綃帳內謂宮嬪曰爾等愛水中鷗鷖爭如我被
底鴛鴦

半仙之戲

天寶宮中至寒食節競豎鞦韆令宮嬪輩戲笑以為宴
樂帝呼為半仙之戲都中士民因而呼之

相風旌

五王宮中各於庭中豎長竿掛五色旌於竿頭旌之四垂綴以小金鈴有聲即使侍從者視旌之所向可以知四方之風候也

占雨石

學士蘇頲有一錦紋花石鏤為筆架常置於硯席間每天欲雨即此石架津出如汗逡巡而雨頲以此常為雨候固無差矣

向火乞兒

張九齡見朝之文武僚屬趨附楊國忠爭求富貴惟九齡未嘗及門楊甚銜之九齡常與識者議曰今時之朝彥皆是向火乞兒一旦火盡灰冷暖氣何在皆凍屍裂體棄骨於溝壑中禍不遠矣果然因祿山之亂附炎者皆罪累族滅不可勝數九齡之先見信夫神智博達也向火言附炎也

結棚避暑

長安富家子劉逸李閑衛曠家世巨豪而好接待四方之士疎財重義有難必救真慷慨之士人皆歸仰焉每至暑伏中各於林亭內植畫柱以錦綺結為涼棚設坐具召長安名妓間坐遞相延請為避暑之會時人無不愛羨也

冰筋

冬至日大雪至午雪霽有晴色因寒所結簷溜皆為冰條妃子使侍兒敲下二條看玩帝自晚朝視政曰問妃

子曰所玩何物也妃子笑而答曰妾所玩者冰筋也帝謂左右曰妃子聰惠比象可愛也

雞聲斷愛

長安名妓劉國容有姿色能吟詩與進士郭昭述相愛他人莫敢窺也後昭述釋褐授天長簿遂與國容相別詰旦赴任行至咸陽國容使一女僕馳矮駒賁短書云歡寢方濃恨雞聲之斷愛恩憐未洽歎馬足以無情使我勞心因君減食再期後會以結齊眉長安子弟多誦

諷焉

占風鐸

岐王宮中於竹林內懸碎玉片子每夜聞玉片子相觸之聲即知有風號為占風鐸

山猿報時

商山隱士高太素累徵不起在山中構道院二十餘間太素起居清心亭下皆茂林秀竹奇花異卉每至一時即有猿一枚詣亭前鞠躬而啼不易其候太素因目之

為報時懷其性度有如此

遊蓋飄青雲

長安春時盛於遊賞園林樹木無閒地故學士蘇頲應
制云飛埃結紅霧遊蓋飄青雲帝覽之嘉賞焉遂以御
花親挿頲之巾上時人榮之

紅水

楊貴妃初承恩召與父母相別泣涕登車時天寒淚結
為紅水

投錢賭寢

明皇未得妃子宮中嬪妃輩投金錢賭侍帝寢以親者為勝召入妃子遂罷此戲

精神頓生

明皇每朝政有闕則虛懷納諫大開士路早朝百辟趨班帝見張九齡風威秀整異於衆僚謂左右曰朕每見九齡使我精神頓生

口案

張九齡累厯刑獄之司無所不察每有公事赴本司行
勘胥吏輩未敢訛劾先取則於九齡囚於前面分曲直
口撰案卷囚無輕重咸樂其罪時人謂之張公口案

言刑

燕公說有宰輔之才而多詭詐復貪財賄時亦多之亦
汙之每中書議事及衆僚巡廳或有所忤立便叱罵為
衆所嫌故朝彥相謂曰張公之言毒於極刑言好而辱
人也

銷冤橋

長安東灞陵有橋來迎去送皆至此橋為離別之地故
人呼之銷冤橋也

逐惡如驅蚊蚋

袁光廷累典名藩皆有異政明皇謂宰輔曰袁光庭性
逐惡如扇驅蚊蚋

歇馬杯

長安自昭應縣至都門官道左右村店之民當大路市

酒量錢數多少飲之亦有施者與行人解之故路人號
為歇馬杯

吹火照書

蘇頲少不得父意常與僕夫雜處而好學不倦每欲讀
書又患無燈燭常於馬廐竈中旋吹火光照書誦焉其
苦學如此後至相位

金牌斷酒

安祿山受帝睠愛常與妃子同食無所不至帝恐外人

以酒毒之遂賜金牌子繫於臂上每有王公召宴欲沃以巨觥祿山即以牌示之云准勅斷酒

文陣雄帥

張九齡常覽蘇頲文卷謂同僚曰蘇生之後贍無敵真文陣之雄帥也

射飛毛

羽林將劉洪善騎射常對御使人於風中擲鵝毛洪連箭射之無有不中帝賞歎厚賜焉

淚粧

宮中嬪妃輩施素粉於兩頰相號為淚粧識者以為不祥後有祿山之亂

索鬪雞

李林甫為性狠狡不得士心每有所行之事多不協羣議而面無和氣國人謂林甫精神剛戾常如索鬪雞

肉陣

楊國忠於冬月常選婢妾肥大者行列於前令遮風蓋

藉人之氣相暖故謂之內陣

傳書鸞

長安豪民郭行先有女子紹蘭適巨商任宗為賈於湘
中數年不歸復音書不達紹蘭目覩堂中有雙鸞戲於
梁間蘭長吁而語於鸞曰我聞鸞子自海東來徃復必
徑由於湘中我婿離家不歸數歲茂有音耗生死存亡
弗可知也欲憑爾附書投於我婿言訖淚下鸞子飛鳴
上下似有所諾蘭復問曰爾若相允當泊我懷中鸞遂

飛於膝上蘭遂吟詩一首云我婿去重湖臨窻泣血書
慙慙憑鸞翼寄與薄情夫蘭遂小書其字繫於足上鸞
遂飛鳴而去任宗時在荊州忽見一鸞飛鳴於頭上宗
訝視之鸞遂泊於肩上見有一小封書繫在足上宗解
而示之乃妻所寄之詩宗感而泣下鸞復飛鳴而去宗
次年歸首出詩示蘭後文士張說傳其事而好事者寫
之

燈婢

寧王宮中每夜於帳前羅列木雕矮婢飾以彩繪各執
華燈自昏達旦故目之為燈婢

解語花

明皇秋八月太液池有千葉白蓮數枝盛開帝與貴戚
宴賞焉左右皆歎羨久之帝指貴妃示於左右曰爭如
我解語花

油幕

長安貴家子弟每至春時遊宴供帳於園圃中隨行載

以油幕或遇陰雨以幕覆之盡歡而歸

鬪花

長安王士安春時鬪花戴插以奇花多者為勝皆用千金市名花植於庭苑中以備春時之鬪也

裙幄

長安士女遊春野步遇名花則設席藉草以紅裙遞相插掛以為宴幄其奢逸如此也

鳳炭

楊國忠家以炭屑用蜜捏塑成雙鳳至冬月則燃於爐中及先以白檀木鋪於爐底餘炭不可參雜也

文帥

明皇常謂侍臣曰張九齡文章自有唐名公皆弗如也朕終身師之不得其一二此人真文場之元帥也

乞巧樓

宮中以錦結成樓殿高百尺上可以勝數十人陳以瓜果酒炙設坐具以祀牛女二星嬪妃各以九孔針五色

線向月穿之過者為得巧之候動清商之曲宴樂達旦
士民之家皆效之

吸花露

貴妃每宿酒初消多苦肺熱嘗凌晨獨遊後苑傍花樹
以手攀枝口吸花露藉其露液潤於肺也

含玉噀津

貴妃素有肉體至夏苦熱常有肺渴每日含一玉魚兒
於口中蓋藉其涼津沃肺也

紅汗

貴妃每至夏月常衣輕綃使侍兒交扇鼓風猶不解其熱每有汗出紅膩而多香或拭之於巾帕之上其色如桃紅也

金函

明皇憂勤國政諫無不從或有章疏規諷則探其理道優長者貯於金函中日置座右時取讀之未嘗懈怠也

擊鑑救月

長安城中每月蝕時即士女取鑑向月擊之滿郭如是
蓋云救月蝕也

歌直千金

宮妓永新者善歌最受明皇寵愛每對御奏歌則絳竹
之聲莫能過帝常謂左右曰此女歌直千金

肉腰刀

李林甫妬賢嫉能不協羣議每奏御之際多所陷人衆
謂林甫為肉腰刀又云林甫嘗以甘言誘人之過謂於

上前時人皆言林甫甘言如蜜朝中相謂曰李公雖面有笑容而肚中鑄劍也人日憎怨異口同音

隔障歌

寧王宮有樂妓寵姐者美姿色善謳唱每宴外客其諸妓女盡在目前惟寵姐容莫能見飲欲半酣詞客李太白恃醉戲曰白久聞王有寵姐善歌今酒殺醉飽羣公宴倦王何怯此女示於衆王笑謂左右曰設七寶花障召寵姐於障後歌之白起謝曰雖不許見面聞其聲亦

幸矣

樓車載樂

楊國忠子弟恃后族之貴極於奢侈每遊春之際以大車結綵帛為樓載女樂數十人自私第聲樂前引出遊園苑中長安豪民貴族皆效之

楊子亂局

一日明皇與親王棋令賀懷智獨奏琵琶妃子立於局前觀之上欲輸次妃子將康國楊子放之令於局上亂

其輸贏上甚悅焉

決雲兒

中王有高麗赤鷹岐王有北山黃鶻上甚愛之每弋獵必置之於駕前帝目之為決雲兒

長湯十六所

華清宮中除供奉兩湯外而別更有長湯十六所嬪御之類浴焉

錦鴈

奉御湯中以文瑤密石中央有玉蓮湯泉湧以成池又
縫錦繡為鳬鴈於水中帝與貴妃施鈿鏤小舟戲翫於
其間宮中退水出於金溝其中珠纓寶絡流出街渠貧
民日有所得焉

夜明枕

號國夫人有夜明枕設於堂中光照一室不假燈燭

金鷄障

明皇每宴使祿山坐於御側以金鷄障隔之

百枝燈樹

韓國夫人置百枝燈樹高八十尺豎之高山上年夜點之百里皆見光明奪月色也

千炬燭圍

楊國忠子弟每至上元夜各有千炬紅燭圍於左右

有脚陽春

宋璟愛民恤物朝野歸美時人咸謂璟為有脚陽春言所至之處如陽春煦物也

梨花之論

李白有天才俊逸之譽每與人談論皆成句讀如春葩麗藻粲於齒牙之下時人號曰李白梨花之論

醉聖

李白嗜酒不拘小節然沉酣中所撰文章未嘗錯誤而與不醉之人相對議事皆不出太白所見時人號為醉聖

靈鵲報喜

時人之家聞鵲聲皆為喜兆故謂靈鵲報喜

走丸之辯

張九齡善談論每與賓客議論經旨滔滔不竭如下坂走丸也時人服其俊辯

探春

都人士女每至正月半後各乘車跨馬供帳於園圃或郊野中為探春之宴

水獸贈王公

楊國忠子弟以姦媚結識朝士每至伏日取堅冰令工人鑿為鳳獸之形或飾以金環綵帶置之雕盤中送與王公大臣惟張九齡不受此惠

嚼麝之談

寧王驕貴極於奢侈每與賓客議論先含嚼沈麝方啓口發談香氣噴於席上

醉語

李林甫每與同僚議及公直之事則如癡醉之人未嘗

問答或語及阿狗之事則響應如流張曲江常謂賓客曰李林甫議事如醉漢腦語也不足可言

暖玉鞍

岐王有玉鞍一面每至冬月則用之雖天氣嚴寒取此鞍在上坐如溫火之氣

百寶欄

楊國忠時因貴妃專寵上賜以木芍藥數本植於家國忠以百寶粧飾欄楯雖帝宮之內不可及也

四香閣

國忠又用沈香為閣檀香為欄以麝香乳香篩土和為泥飾壁每於春時木芍藥盛開之際聚賓客於此閣上賞花馬禁中沈香之亭遠不侔此壯麗也

任人如市瓜

明皇召諸學士宴於便殿因酒酣顧謂李白曰我朝與天后之朝何如白曰天后朝政出多門國由姦幸任人之道如小兒市瓜不擇香味惟揀肥大者我朝任人如

淘沙取金剖石採玉皆得其精粹明皇笑曰學士過有所飾

雪刺滿頭

宋璟求致仕表云臣竊祿簪裳備員廊廟霜毫生領雪刺滿頭求退歸耕養慵巖穴樂生堯世死荷聖恩

忍字

光祿卿王守和未嘗與人有爭嘗於案几間大書忍字至於幃幌之屬以繡畫為之明皇知其姓字非時引對

問曰卿名守和已知不爭好書忍字尤見用心奏曰臣聞堅而必斷剛則必折萬事之中忍字為上帝善賜帛以旌之

風流陣

明皇與貴妃每至酒酣使妃子統官妓百餘人帝統小中貴百餘人排兩陣於掖庭中目為風流陣以霞帔錦被張之為旗幟攻擊相鬪敗者罰之巨觥以戲笑時議以為不祥之兆後果有祿山兵亂天意人事不偶然也

望月臺

玄宗八月十五日夜與貴妃臨太液池凭欄望月不盡
帝意不快遂勅令左右於池西岸別築百尺高臺與吾
妃子來年望月後經祿山之兵不復置焉惟有基址而
已


竹義

太液池岸有竹數十叢牙筍未嘗相離密密如栽也帝
因與諸王間步於竹間帝謂諸王曰人世父子兄弟尚

有離心離意此竹宗本不相疎人有懷貳心生離間之意觀此可以為鑑諸親王皆唯唯帝呼為竹義

美人呵筆

李白于便殿對明皇撰詔誥時十月大寒凍筆莫能書字帝勅宮嬪十人侍于李白左右令各執牙筆呵之遂取而書其詔其受聖眷如此



說郭卷五十二上

欽定四庫全書

子部

說郛卷五十二
上

詳校官檢討臣羅國俊

員外郎臣牛稔文覆勘

總校官編修臣倉聖脉

校對官檢討臣龔大萬

謄錄監生臣張子誠

欽定四庫全書

說郛卷五十二下

元 陶宗儀 撰

傳信記序

余何為者也累參臺郎思勤墳典用自修勵竊以國朝
故事莫盛於開元天寶之際服膺簡策管窺王業參於
聞聽或有闕焉承平之盛不可殞墜輒因簿領之暇搜
求遺逸傳於必信者曰開元傳信記斗筭微器周鼎不
節之咎何已遐乎好事者觀其志寬其愚是其心也唐

吏部員外郎鄭榮撰

傳信記 鄭榮

上於藩邸時每戲遊城南韋杜之間因逐狡兔意樂亡
返與其徒十數一飲倦甚休息於封部大樹下適有書
生延上過其家家貧止於村妻一驢而已上坐未久書
生殺驢拔蒜備饌酒肉霧霈上顧而竒之及與語磊落
不凡問其姓名乃王琚也自是上每遊韋杜間必過琚
家諮議合意益親善焉及韋氏專制上憂甚獨密言於
琚琚曰亂則殺之又何疑也上遂納琚之謀戡定禍難

累拜為中書侍郎實預配享焉

上於諸王友愛特甚常思作長枕與諸王同起卧諸王有疾上輒終日不食終夜不寢形憂于色左右或開諭進食上曰弟兄吾手足也手足不理吾身廢矣何暇更思美食安寢邪上于東都起五王宅于上都製花萼相輝之樓蓋與諸王為會集宴樂之地上與諸王靡日不會聚或講經義論理道間以毬獵捕博賦詩飲食歡笑戲謔未嘗怠惰近古帝王友愛之道無與比也

開元初上勵精理道鏟革訛弊不六七年天下大治河清
海晏物殷俗阜安西諸國悉平為郡縣自國開遠門西
亘地萬餘里入河隍之賦稅左右藏庫財物山積不
可勝較四方豐稔百姓殷富管戶一千餘萬米一斗三
四文丁壯之人不識兵器路不拾遺行者不囊糧其瑞
疊應重譯膺至人情欣欣然感登岱告成之事上猶惕
厲不已為讓者數焉是時劉晏年八歲獻東封書上覽
而奇之命宰相出題就中書試驗張說源乾曜等咸寵

薦上以晏間生秀妙引晏于內殿縱六官觀看貴妃坐晏於膝上親為晏畫眉搃髻宮中人投果遺花者不可勝數也尋拜晏祕書省正字

開元初山東大蝗姚元崇請分遣使捕蝗埋之上曰蝗天災也誠由不德而致焉卿請捕蝗得毋違天而傷義乎元崇進曰臣聞大田詩曰秉畀炎火者捕蝗之術也古人行之于前陛下用之于後古人行之所以安農陛下行之所以除害臣聞安農非傷義也農安則物豐除害

則人豐樂興農去害有國之大事也幸陛下熟思之上
喜曰事既師古用可救時是朕心也遂行之時中外咸
以為不可上謂左右曰吾與賢相討論已定捕蝗之事
敢議者死是歲所司結秦捕蝗虫凡百餘萬石時無飢
饉天下賴焉

上將登封泰山益州進白騾至潔朗豐潤權奇偉異上
遂親乘之柔習安便不知登降之倦告成禮畢復乘而
下纔下山均休息未久而有司言白騾無疾而殪上歎

異之謚曰白驃將軍命有司具槨積疊石為墓在封禪壇北一里餘于今存焉

上為皇孫時風表瓌異神彩美邁嘗於朝堂叱武攸暨曰朝堂我家朝堂汝得恣蜂蠆而狼顧耶則天驚異之再三顧曰此兒氣槩不常為吾家太平天子也

西涼州俗好音樂製新曲曰涼州開元中列上獻上召諸王使殿同觀曲終諸王賀舞蹈稱善獨寧王不拜上顧問之寧王進曰此曲雖嘉臣有聞焉夫音者始于宮

散于商成於角徵羽莫不根抵囊橐於宮商也斯曲也
宮雜而少徵商亂而加暴臣聞宮君也商臣也官不勝
則主勢卑商有餘則臣事僭卑則逼下僭則犯上發于
隱微形於音聲播於歌詠見之於人事臣恐一日有播
越之禍悖逼之患莫不兆於斯曲也上聞之默然及安
史作亂華夏鼎沸所以見寧王審音之妙也

天寶中上以三河道險束漕運艱難乃旁北山鑿石為
月河以避急湍名曰天寶河歲省運夫五十萬人無覆

溺淹滯之患天下稱之其河東西徑直長五里餘濶四
五大深三四大皆鑿堅石匠人於石得古鐵鏟長三尺
餘上有平陸二字皆篆文也上異之藏於內庫遂命改
河北縣為平陸縣旌其事也

上御勤政樓大酺縱士庶觀看百戲競作人物填喧金
吾衛士白棒雨下不能制止上患之謂力士曰吾以海
內豐稔四方無事故盛為宴樂耳與百姓同懽不知下
人喧亂如此汝何方止之力士曰臣不能也陛下試召

嚴安之處分打場以臣所見必有可觀上從之安之到則周行廣場以手板畫地示衆曰犯此者死以是終五日酺宴咸指其地畫曰嚴公界境無一人敢犯者

蘇瓌初未知題常處題於馬廐中與傭僕雜作一日有客詣瓌候於廳所題擁篲趨庭遺陸文書客収視之乃詠崑崙奴詩也其詞曰指頭十挺墨耳朶兩張是客心異之而瓌出與客淹留客笑語之餘因詠其詩并言形貌問何人非足下宗族庶孽耶若加禮収舉必蘇氏之

令子也。瓌自是稍稍親之。適有人獻瓌兔懸於廊廡間。瓌乃召頤詠之。立呈詩曰：「兔子死，闌彈持來掛竹竿。試將明鏡照何異，月中看瓌大驚竒。」驟加禮敬。頤由是學問日新。文章益代及上平內難，一夕間制詔絡繹無非。頤出代稱小許公也。

道士葉法善精于符籙之術，上累拜為鴻臚卿，優禮待焉。法善居玄真觀，嘗有朝客數十人詣之，解帶淹留滿座。思酒忽有人叩門云：「麴秀才法善令人謂曰：方有朝。」

僚未暇瞻晤幸吾子異日見臨也語未畢有一秀才傲
晚直入年二十餘肥白可觀笑揖諸公居末席伉聲談
論援引古人一席不測恐聳觀之良久暫起旋轉法善
謂諸公曰此子突入語辨如此豈非魑魅為惑乎試與
諸公避之麴生復至扼腕抵掌論難蜂起勢不可當法
善密以小劍擊之隨手失墜于階下化為瓶榼一座驚
懾遽視其所乃盈瓶醲醑也咸大笑飲之其味甚嘉坐
客醉而揖其瓶曰麴生風味不可忘也

上命裴寬為河南尹寬性好釋氏師事普寂禪師旦夕
造謁焉居一日寬詣寂寂曰有少事未暇款語且請遲
回休憩也寬乃屏賓從止於空室見寂潔滌正堂焚香
端坐坐未久忽聞扣門連聲云一行大師至一行入詣
作禮禮寂之足禮訖附耳密語其貌絕恭寂但顧云無
不可者語訖入禮禮語如是三寂惟云是是一行語訖
降階入南堂自閤其扉寂乃徐命弟子云遣聲鍾一行
和尚滅度矣左右疾走視之一如其言後寂滅度寬復

袁經葬之日徒步出城送之甚為縉紳所譏也寬子諳復為河南尹素好詼諧多異筆嘗有投牒誤書紙背諳判云者畔似那畔那畔似者畔我不可辭與你判笑殺門前着靴漢又有婦人投狀爭猫兒狀云若是兒猫即不是兒猫若不是兒猫即不是兒猫諳大笑判狀云猫兒不識主旁我搨老鼠兩家不須爭將來與裴諳遂納其猫兒爭者亦哂

安祿山初為張韓公帳下走使之吏韓常令祿山洗足

韓公脚下有黑點子祿山因洗脚而竊窺之韓公顧笑曰黑子吾貴相也獨汝窺之亦能有之乎祿山曰某賤人也不幸兩足皆有比將軍者黑而加丈不知此何祥也韓公竒而觀之益親厚之約為義兒為加寵焉

太真妃最善於擊磬拊搏之音泠泠然新聲雖太常梨園之能人莫加也上令採藍田綠玉琢為器上造真簾流蘇之屬皆以金鈿珠翠珍怪之物雜飾之又鑄二金獅子作拏攫騰奮之狀各重二百餘斤其他綵繪縟麗

造作神妙一時無比也上幸蜀回京師樂器多亡失獨
王磬偶在上顧之悽然不忍置于前遂命送太常至今
藏於太常正樂庫

上幸蜀回車駕次劍門門左右巖壁峭絕上謂侍臣曰
劍門天險若此自古及今敗亡相繼豈非在德不在險
耶因駐蹕題詩曰劍閣橫雲峻鑒興出狩回翠屏千仞
合丹障五丁開灌木縈旗轉仙雲拂馬來乘時方在德
嗟爾勒銘才其詩至德二年普安郡太守賈深勒于石

壁今存焉

賀知章祕書監有高名告老歸吳中上嘉重之每別優異焉知章將行涕泣辭上上曰何所欲知章曰臣有男未有定名幸陛下賜之歸為鄉里榮上曰為道之要莫若信乎孚者信也履信思乎順卿子必信順之人也宜名之曰孚知章再拜而受命知章久而謂人曰上何詭我吳人耶孚乃爪下為子豈非呼我為瓜子耶

上嘗坐朝以手指上下按其腹朝退高力士進曰陛下

向來數以手指按其腹豈非聖體小不安耶上曰非也
吾昨夜夢遊月宮諸仙娛以上清之樂寥亮清越殆非
人間所聞也酣醉久之合奏諸樂以送吾歸其曲淒楚
動人杳杳在耳吾回以玉笛尋之盡得之矣坐朝之際
慮忽遺忘故懷玉笛時以手指上下尋非不安力士再
拜賀曰非常之事也願陛下為臣一奏之其聲寥寥然
不可名言也力士又再拜且請其名上笑言曰此曲名
紫雲回遂載于樂章今太常刻名存焉

上封泰山進次滎陽旃然河上見黑龍命弧矢射之矢
發龍潛滅自爾旃然伏流于今百餘年矣按旃然即濟
水也溢而為滎遂名旃然左傳云楚師濟于旃然是也
華岳雲臺觀中方之上有山崛起半瓮之狀名曰瓮肚
峯上賞望嘉其高迥欲于峯腹大鑿開元二字填以白
石令百餘里望見諫官上言乃止

上於弘農古函谷關得寶符白石篆文正成乘字識者
解之云乘者四十八年得寶之時天下言之曰得寶弘

農得寶耶於今唱之得寶之年遂改天寶也

上幸愛祿山為子嘗與貴妃於便殿同樂祿山每就坐
不拜上而拜妃上顧問汝竟不拜我而拜妃其意何在
也祿山奏曰臣地凡事必先母而後父故也上笑而捨
之祿山豐肥大腹上嘗問曰汝之腹中何物其大如是
祿山尋聲應曰腹中更無他物唯赤心爾上以言誠而
益親善之

一行將卒留物一封命弟子進於上發而視之乃蜀當

歸也上初不諭及幸蜀回乃知微旨深歎異之

羅公遠多祕術最善隱形之法上就公遠雖傳受不肯盡其要上每與同為之則隱没人不能知若自試或餘衣帶或露幙頭脚每被宮人知上所在上怒命力士裹以油幙置榨木下壓殺埋棄之不自日有中使自蜀道回逢公遠於路乘驟而笑謂使者曰上之為戲一何虐耶

萬回師閩鄉人也神用若不足謂愚而癡無所知雖父

母亦以豚犬畜之兄被戍後安西音問隔絕父母謂其誠死日夕涕泣而憂思也萬回顧父感念甚忽跪而言曰涕泣豈非憂兄耶父母曰信然萬回曰詳思我兄所要者衣裝糗糧之屬悉備之某將覲焉忽一日朝覲所備夕返其家告父母曰兄平善矣發書視之乃兄迹也一家異之弘農抵安西萬餘里以其萬里而廻故謂之萬回也居常貌如愚癡忽有先覺異見驚人神異也上在藩邸或遊行人間萬回於聚落街衢高聲曰天子來

或曰聖人來其處信宿間上必經過徘徊

安樂公主上之李妹也附會韋氏上見一物如人動遍體被毛毛如猪立踞牙鉤爪三尺餘以擊林甫目如電光而怒視之林甫連叱不動遂命弧矢毛人笑而跳入前堂堂中青衣遇而暴卒經於廐中善馬皆死不累日而林甫卒

太真妃常因妬媚有語侵上上怒甚召高力士以輜輶送其家妃悔恨號泣抽刀剪髮授力士曰珠玉珍異皆

上所賜不足充獻唯髮父母所生可達妾意望持此伸
妾萬一幕戀之誠上得髮揮涕憫然遽命力士召歸

天寶初上遊華清宮有劉朝霞者獻幸溫泉賦詞調個
儻雜以俳諧文多不載今畧其詞曰若夫天寶二年十
月後兮臘月前辦有司之供具命駕幸于溫泉天門乾
開露神仙之輻湊鑾輿劃出駟甲仗以駢闐青一隊兮
黃一隊熊踏胸兮豹擎背朱一團兮綉一團玉鏤珂兮
金鏤鞍述德云直攬得盤古髓搯得女媧瓢遮莫你古

時千帝豈如我今日三郎其自叙云別有窮奇蹭蹬失
路猖狂骨體雖短伎藝能長夢裏幾回富貴覺來依舊
悽惶今日是千年一遇叩頭莫五角六張帝覽而奇之
將加賞上命朝霞改去五角六張字奏云臣草此賦時
有神助自謂文不加點筆不停綴不願從天而改上顧
曰真窮薄人也授以春官衛上左焉

幽閒鼓吹

張固

宣宗屬念萬壽公主蓋武皇世有保護之功也駙馬鄭
尚書之弟顥嘗危疾上使訊之使迴上問公主視疾否
曰無何在曰在慈恩寺看戲場上大怒且歎曰我恠士
大夫不欲與我為親良有以也命召公主公主走輦至
則立於階下不視久之主大懼涕泣辭謝上責曰豈有
小郎病乃親看他處乎立遣歸宅畢宣宗之世婦禮以
脩飾

宣宗暇日召翰林學士時韋尚書渙遽入上曰要與卿
款曲少間出外但言論詩上乃出新詩一篇有小黃門
置茶訖亦屏之乃問曰朕於勅使如何韋公即述上威
制前朝無比上閉目搖首曰總未總未依前怕他在於
卿如何計將安出韋公既不為之素備乃率意對曰以
臣所見謀之於外庭即恐有太和末事不若就其中揀
拔有才識者委以計事何如上曰此乃末策朕已行之
初擢其小者自黃至綠至緋皆感恩若紫衣挂身即一

片矣公慙汗而退噫大君之問社稷之福對數止此惜哉

裴公休在相位一日奏對宣宗曰今賜卿無畏有何貯畫言之公嘗蓄論儲宮之意至是乃頓首以諫上曰若立儲君便是閒人公不敢盡言而退

宣宗坐朝次對官趨至必待氣息平均然後問事令狐相進李遠為杭州宣宗曰比聞李遠詩云長日唯銷一局棋豈可以臨郡哉對曰詩人之言不足為實也仍薦

逵廉察可任乃俞之

宣宗視逵郡謝上表左右曰不足煩聖慮也上曰逵郡無非時章奏只有此謝上表安知其不有情懇乎吾不敢忽也

張長史釋褐為蘇州常熟尉上後旬日有老父過狀判去不數日復至乃怒而責曰敢以閒事屢擾公門老父曰某實非論事但覩少公筆跡奇妙貴為篋笥之珍耳長史異之因詰其何得愛書答曰先父愛書兼有著述

長史取視之曰信天下工書者也自是備得筆法之妙
冠於一時

白尚書應舉初至京以詩謁顧著作顧覩姓名熟視白
公曰米價方貴居亦弗易乃披卷首篇曰咸陽原上草
一歲一枯榮野火燒不盡春風吹又生即嗟賞曰道得
箇語居即易矣因為之延譽聲名大振

喬彞京兆府解試時有二試官彞日午叩門試官令引
入則已醺醉視題曰幽蘭賦不肯作曰兩箇漢相對作

此題速改之為渥洼馬賦曰校此子奮筆斯須而就警句云四蹄曳練翻瀚海之驚濤一噴生風下邊山之亂葉便欲首送京尹曰喬彞崢嶸甚宜以解副薦之

李藩侍郎嘗綴李賀歌詩為之集序未成知賀有表兄與賀筆硯之舊者召之見託以搜訪所遺其人敬謝且請曰某盡記其所為亦見其多點竄者請得所葺者視之當為改定李公喜併付之彌年絕跡李公怒復召詰之其人曰某與賀中外自小同處恨其傲忽常思報之

所得兼舊有者一時投於溷中矣李公大怒叱出之嗟恨良久故賀篇什流傳者少

李賀以歌詩謁韓吏部吏部時為國子博士分司送客歸極困門人呈卷解帶旋讀之首篇鴈門太守行曰黑雲壓城城欲摧甲光向日金鱗開却援帶命邀之

苗帝師困於名場一年似得復落第春景暄妍策蹇驢出都門貰酒一壺藉草而坐醺醉而寐久之既覺有老父坐其旁因揖叙以餘杯飲老父媿謝曰郎君紫幘恥

寧要知前事耶苗曰某應舉已久有一第分乎曰大有
事但更問苗曰某困於窮蹇一郡寧可及乎曰更向上
曰廉察乎曰更向上苗公乘酒猛問曰將相乎曰更向
上苗公怒全不信因肆言曰將相向上作天子乎老父
曰天子真者即不得假者即得苗都以為恠誕揖之而
去後果為將相及德宗昇遐攝冢宰三日

賓客劉公之為屯田員外郎時事勢稍異旦夕有騰趨
之勢知一僧有術數極精寓直日邀之至省方欲問命

報韋秀才在門外公不得已且令僧坐簾下韋秀才獻
卷已畧省之而意色殊倦韋覺之乃去與僧語不對吁
嗟良久乃曰某欲言員外必不愜如何公曰但言之僧
曰員外後遷乃本行正郎也然須待適來韋秀才知印
處置公大怒揖出之不旬日貶官韋秀才乃處厚相也
後三十餘年在中書劉轉屯田郎中

朱崖李相在維揚封川李相在湖州拜賓客分司朱崖
大懼遣專使厚致信好封川不受取路江西而過非久

朱崖入相過洛封川憂懼多方求厚善者致書乞一見
欲解紛復書曰怨即不怨見即無端初朱崖封川早相
善在中外致力及位高稍稍相傾及封川在位朱崖為
兵部尚書自得歧路必當大拜封川多方阻之未効朱
崖知而憂之邠公杜相即封川黨時為京兆尹一日謁
封川封川深念杜公進曰何戚戚也封川曰君揣我何
念杜公曰非大戎乎曰是也何以相救曰某即有策顧
相公必不能用耳曰請言之杜曰大戎有辭學而不由

科第于今怏怏若與知舉則必喜矣封川默然良久曰
更思其次曰更有一官亦可平治嫌恨曰何官曰御史
大夫封川曰此即得邠公再三與約乃馳詣安邑門門
人報杜尹來朱崖迎揖曰安得訪此寂寞對曰靖安相
公有意旨令某傳達遂言亞相之拜朱崖驚喜雙淚遽
落曰大門官小子豈敢當此薦拔寄謝重疊杜遽告封
川封川與虔州議之竟為所隳終致後禍

朱崖在維揚監軍使楊欽義追入必為樞近而朱崖致

禮皆不越尋常欽義心銜之一日邀中堂飲更無餘賓而陳設寶器圖畫數牀皆殊絕一席祇奉亦竭情禮起後皆以贈之欽義大喜過望旬日行至汴州有詔令監淮南軍欽義至即具前時所獲歸之朱崖笑曰此無所直奈何相拒一時却與欽義感悅數倍後竟作樞密使武皇一朝之柄用皆自欽義也

李師古跋扈憚杜黃裳為相未敢失禮乃命一幹吏寄錢數千緡并羶車子一乘亦直千緡使者未敢遽送乃

於宅門伺候累日有綠輿自宅出從婢二人青衣藍縷問何人曰相公夫人使者遽歸以告師古師古折其謀終身不敢失節潘炎侍郎德宗時為翰林學士恩渥極異其妻劉氏晏相之女也京尹某有故伺候累日不得見乃遺閹者三百縑夫人知之謂潘曰豈有人臣京尹願一見遺奴三百疋縑帛其危可知也遽勸潘公避位子孟陽初為戶部侍郎夫人憂惕謂曰以爾人材而在丞郎之位吾懼禍之必至也戶部解喻再三乃曰不然

試會爾同列吾觀之因遍招深熟者客至夫人垂簾視之既罷會喜曰皆爾之儔也不足憂矣末座慘綠少年何人也答曰補闕杜黃裳夫人曰此人全別必是有名卿相元相在鄂州周復為從事相國常賦詩命院中屬和周正郎乃簪笏見相公曰某偶以大人往還高門謬獲一第其實詩賦皆不能也相國嘉之曰遽以實告賢於能詩者矣

裴寬尚書罷郡西歸汴流中日晚維舟見一人坐樹下

衣服極弊因命屈之與語大奇之遂為見智曰以君才識必
自當富貴何貧也舉船錢帛奴婢貺之客亦不讓所惠語
訖上船奴婢偃蹇者鞭撻之裴公益奇之其人乃張徐州
安祿山將反前三兩日於宅宴集大將十餘人錫賚絕
厚滿廳施大圖圖山川險易攻取剽劫之勢每人付一
圖令曰有違者斬直至洛陽指揮皆畢諸將承命不敢
出聲而去於是行至洛陽悉如其畫也

張正甫為河南尹裴中令銜命代淮西置宴府西亭裴

公舉一人詞藝好解頭張相公正色曰相公此行何為也爭記得河南府解頭中令有慙色

崔咸舍人嘗受張公之知及懸車之後公與議行止崔時為司封郎中以感知之分極言贊美公便令製表表上值無厚善者而一章允請三數月後門館聞寂家人輩竊罵之公後亦悔每語子弟曰後有大段事勿與少年郎議之

崔造相將退位親厚皆勉之長女賢知書獨勸相國遂

決退一二歲中居閑躁悶顧謂免姪曰不得他諸道金銅茶籠子物掩也遂復起

相國張延賞將判度支知有一大獄頗有冤濫每甚扼腕及判使即召獄吏嚴誡之且曰此獄已久旬日須了明旦視事案上有一小帖子曰錢三萬貫乞不問此獄公大怒更促之明日帖子復來曰錢五萬貫公益怒命兩日須畢明日復見帖子曰錢十萬貫公曰錢至十萬可通神矣無不可回之事吾懼及禍不得不止

元相載在中書日有丈人自宣州所居來投求一職事
中書度其材不任事贈河北一函書而遣之丈人悅怒
不得已持書而去既至幽州念破產而來止公一書書
若懇切猶可望乃拆而閱之更無一辭唯署名而已大
悔怒欲回心念已行數千里試謁院寮問既是相公丈
人豈無緘題曰有判官大驚立命謁者上白斯須乃有
大校持箱復請書書既入館之上舍留連數日及辭去
奉絹一千足

元載子伯和勢傾中外福州觀察使寄樂妓十人既至半載不得送使者窺伺門下出入頻者有琵琶康崑崙最熟厚遺求通即送妓伯和一試奏盡以遺之先有段和尚善琵琶自製西梁州崑崙求之不與至是以樂之半贈之乃傳焉道調梁州是也

丞相牛公應舉知于頔相之奇俊也特詣襄陽求知住數月兩見以海客遇之牛公怒而去去後忽召客將問曰累日前有牛秀才發未曰已去何以贈之曰與之五

百受之乎曰擲之于庭而去于公大恨謂賓佐曰某蓋
事繁有闕違者立命小將賁絹五百書一函追之曰未
出界即領來如已出界即送書信小將於界外追及牛
公不啓封揖迴

是書為有唐張固撰共二十五篇固在懿僖間採撫
宣宗遺事簡當精覈誠可以補史氏之闕余家藏有
固宋本將刻而傳焉嘉靖壬午春三月吳郡大石山
人顧元慶

撫異記

李潛

潛憶兒童時即歷聞公卿間叙國朝故事且兼多語
其世事特異者取其必實之跡暇日綴成一小軸貯
之松窻

玄宗先天中再平內難後以中外無事銳意政理好於
觀書迨自周漢以來有所未及者必欲盡舉之帝既勤
書海內之風翕然率化尤注意於起居注先天開元中
皆選當時鴻儒或貞正之士充之若有舉其職者雖十

數年猶載筆螭頭惜不欲去則遷名曹郎與兼之自先天元年至大寶十一載冬季起居注撰成七百卷內起居注撰成三百卷內起居注自開元二年春因上幸寧王宅叙家人禮至於樂奏前後酒食沾賚上無自專皆令稟於寧王教上曰大哥好作主人阿喘但謹為上客

上在禁中常自稱阿喘

以是極歡而罷明日寧王率岐薛已下同

奏曰臣聞起居注必記天子言動臣恐左右史不得天子閨行極庶人之禮無以光示萬代臣請自今後臣與

兄弟各輪日載筆於乘輿前得以行在紀叙其事四季則用朱印聯名牒送史館然皆依外史例悉上聞庶明臣等守職如螭頭官上以八分書日本國紙為答辭甚謹上然悉允所奏自是天寶十載冬季以成三百卷率以五十幅黃麻為一編用雕檀軸紫龍鳳綾標書成寧王上請自部納于史閣上命賜以酒樂共宴侍臣於史館上寶惜是史尤甚因命別起大閣以貯之及祿山陷長安用嚴高計未至升殿官先以火千炬猛焚是閣不移

時灰滅故玄宗實錄百不叙及三四以是入間傳記者

尤鮮

祿山謀臣
嚴莊高尚

開元中禁中初重木芍藥即今牡丹也

開元天寶花木
記云木芍藥禁

中呼為
牡丹花

得四本紅紫淺紅通白者上因移植於興慶池

東沉香亭前會花方繁開上乘月夜召太真妃以步輦

從詔特選梨園弟子中尤者得樂十六色李龜年以歌

擅一時之名手捧檀板押衆樂前欲歌之上曰賞名花

對妃子焉用舊樂詞為遂命龜年持金花牋宣賜翰林

學士李白進清平調詞三章白欣承詔旨猶苦宿醒未
解因援筆賦之雲想衣裳花想容春風拂檻露華濃若
非羣玉山頭見會向瑤臺月下逢一枝紅艷露凝香雲
雨巫山枉斷腸借問漢宮誰得似可憐飛燕倚新粧名
花傾國兩相歡長得君王帶笑看解釋春風無限恨沉
香亭北倚闌干龜年遽以詞進上命梨園弟子約畧調
撫絃竹遂促龜年以歌太真妃持頗梨七寶盃酌西涼
州蒲萄酒笑領意甚厚上因調玉笛以倚曲每曲遍將

換則遲其聲以媚之太真飲罷飾繡巾重拜上意龜年
常話於五王獨憶以歌得自與者無出於此抑亦一時
之極致耳上自是顧李翰林尤異於他學士會高力士
終以脫烏皮六絳為深恥異日太真妃重吟前詞力士
戲曰始謂妃子怨李白深入骨髓何拳拳如是太真妃
因驚曰何翰林學士能辱人如斯力士曰以飛燕指妃
子是賤之甚矣太真頗深然之上嘗欲命李白官卒為
官中所捍而止

玄宗幸東都偶因秋霽與一行師共登天宮寺閣臨眺
久之上遐顧愴然發歎數四謂一行曰吾甲子得終無
患乎一行進曰陛下行幸萬里聖祚無疆及西行初至
成都前望大橋上舉鞭問左右曰是橋何名節度使崔
圓躍馬前進曰萬里橋上因追歎曰一行之言今果符
之吾無憂矣

上好馬擊毬內廐所飼者意猶未甚適會黃幡綽戲語
相解因曰吾欲良馬久之而誰能通於馬經者幡綽奏

曰臣能知之且曰今三丞相悉善馬經上曰吾與三丞相語政事之外悉究其旁學不聞有通馬經者爾馬得之幡綽曰臣日日沙堤上見丞相所乘馬皆良馬也是必知通馬經上因大笑而語他

上自臨淄郡王為潞州別駕乞假歸京師觀時晦跡尤用卑損會春暮豪家子數輩盛酒饌遊於昆明池選勝方宴上戎服臂小鷹於野次因疾驅直突會前諸子輩頗露難色忽一少年持酒船唱令曰宜以門族官品備

陳之酒及於上因大聲曰曾祖天子父相王臨淄郡王
某也諸少年聞之驚走四散不敢復視於車服上因聯
飲三銀船盡一巨飴徐乘馬而東去

上初以林邑國進白鸚鵡惠利之性特異常者因暇日
以金飾之示於三相上再三美之時蘇頲初入相每以
忠讓勵上因前進曰書云鸚鵡能言不離飛鳥臣願陛
下深以為誠

何皇后始以色進及上登位不數年恩寵日衰后憂畏

之狀愈不自安然撫下有恩幸免讒語共危之禍忽一日泣訴於上曰三郎獨不記何忠脫新紫半臂更得一斗麵為三郎生日湯餅耶何忍不追念於前時上聞之戚然改容有憫皇后之色由是得延於其恩者三更秋終以諸妃恩遇日盛皇后竟見黜焉后無罪被擯六宮共憐之

何忠何后自呼其父名也

中宗嘗召宰相蘇瓌李嶠子進見二丞相子皆童年上近撫於赭袍前賜與甚厚因語二兒曰爾日憶所通書

可為吾奏者言之頤應曰未從繩則正后從諫則聖嶠

子

失其名

亦進曰斬朝涉之脛剖賢人之心上曰蘇瓌有

子李嶠無兒

德宗命李泌為相以泌三朝顧遇禮待信用不與諸宰

相等常於便殿語及玄宗朝尤惜謬用李林甫因再三

嘆息重言曰中原之禍自林甫始也然以玄宗英特之

姿何始不察耶泌因奏曰玄宗盛年始初已歷則天中

宗多難之後雖江充將陷戾元賈后欲圖愍懷於睿宗

之患無以改過也及降封臨淄旋出入閣上下鄂杜之問備聞人間疾苦又以天縱英姿志除內難有漢宣之多異仗蕭王之赤誠故英威一震姦兇自殪而風尚儒學深達政經薄漢高馬上之言美武帝更僕之問自初登寶位樂近正人惟帝之難力所能舉上既勤儉政事無不施行又得良臣天下自化及東封之後上每覽帝籍有自多之言用聲色為娛漸堂階之峻故古語曰貧不學儉而儉自來富不學奢而奢自至若以勤儉為志

則臣下守法官無邪人及嗜慾稍深則政亦怠矣故林甫善為承迎上意招攬金王託庇左右安國委相之跡如是則百吏可知是以楊雄言昔武帝運帑藏之財填廬山之壑未為害也今貨入權門甚於此矣林甫未厭仙客繼之昔齊桓以管仲存而霸業成管仲亡而齊難作則古人所諷見於深旨由是泌屢以是非諷之上怡然聽從似喜所得因曰相才而又知書吾高枕矣太和開成中有程修己者以善畫得進謁修己始以孝廉召

入籍故上不甚以畫者流視之會春暮內殿賞牡丹花
上頗好詩因問修已曰今京邑傳唱牡丹花詩誰為首
出修已對曰臣嘗聞公卿間多吟賞中書舍人李正封
詩曰天香夜染衣國色朝酣酒上聞之嗟賞移時楊妃
方恃恩寵上笑謂貴妃曰粧鏡臺前宜飲以一紫金盞
酒則正封之詩見矣

自太和乙卯歲後上不樂事稍閒則有歎息之音會幸
三殿東亭因見橫廊架巨軸於其上上謂修已曰斯開

元東封圖也因命內巨軸懸於東廡下上舉白玉如意指張說輩數人歎曰使吾得其中一人來則吾可見開元矣由是惋惜之意見于顏色遂命進美酎盡爵促步輦歸寢殿開成永諸錄中叙上語李右相曰吾思天下事難理則進飲醲酎以自醉解

狄仁傑之為相也有盧氏堂姨居于午橋南別墅姨止有一子而未嘗來都城親戚家梁公每遇伏臘晦朔修禮甚謹嘗經甚雪多休暇因候盧姨安否適見表弟挾

弓矢携雉兔來歸膳味進於北堂顧揖梁公意甚輕簡
公因啓姨曰某今為相表弟有何樂從願悉力以從其
旨姨曰相自貴爾有一子不欲令其事女主公大慙而
退

姚崇為相忽一日對於便殿舉左足不甚輕利上曰卿
有足疾耶崇曰臣有腹心之疾非足疾也因前奏張說
罪狀數百言上怒曰卿歸中書宜宣與御史中丞共按
其事而說未之知會朱衣吏報午後三刻說乘馬先歸

崇急呼御史中丞李林甫以前詔付之林甫語崇曰說多智謀是必困之宜以劇地崇對曰丞相得罪未宜太偏林甫曰公必不忍耶說當無害林甫正將詔付於御史中路以馬墜告假說之未遭崇搆也前旬月有教授書生私通於侍婢最寵者會擒得姦狀以聞於說說怒甚將窮獄於京兆尹書生勵聲曰覩色不能禁亦人之常情也公貴為相豈無緩急用人乎斬於一婢女耶說竒其言而釋之以侍兒與歸書生一跳跡去旬月餘

無所聞知忽一日直訪於說憂色滿面且言某感公之
思思有謝者久之今方聞公為姚相國所搆外獄將具
公不知之危將至矣某願得公平生所寶者用計於九
公主必能立釋之說因自厯指狀所寶之物書生告云
未足解公之難又凝思久之忽曰近有雞林郡夜明簾
為寄信者書生曰吾事濟矣因請手札數行懇以情言
遂急趨出逮夜始及九公主邸第書生具以說告言之
兼用簾為贄且請公主曰上獨不念在東宮時思必始

終恩加張丞相乎而今反用快不利張丞相之心耶明
旦公主入謁具為奏之上感動急命高力士就御史臺
宣前所按事並宜罷之書生亦不再見張丞相矣

太尉衛國公為并州從事到職未旬月忽有王山人者
詣門請謁公命與坐乃曰某善按冥也公初未之奇因
請正寢備几案紙筆香水而已因令垂簾靜伺之生與
公偕坐於西廡下頃之王生曰可驗矣紙上書八字甚
大且有楷注曰位極人臣壽六十四王生遽請歸竟不

知所去及會昌朝三策一品薨於海南果符王生所按之年

衛公長慶中在浙右會有漁人於秦淮垂機網下深處忽覺力舉異於常時及歛就水次卒不獲一鱗忽得古銅鏡可尺餘光浮於波際漁人驚取照之歷歷盡見五臟六腑榮脉動竦駭神鬼因脫戰而墜漁人偶話於舍旁遂乃聞之於公盡周歲萬計窮索水底終不復得

物之異聞

雷公鑠

辟塵犀簪

煖金魚袋

青龍皮

鄱陽王

墓中自動墨研

日中軟杖子

龍腦香毘崙子

元

先生贈韋丹尚書鮫鮓

鏤白玉香囊并玉鑠子長三

尺餘

異竹篾長二百餘尺

黃楊枕文有乘龍形

張公洞翠碧中藏上藥

桃源洞中仙人棋子不

生澁鐵腰帶

韋殷尚書夢中所得軟羅纈巾

西蜀

織成蘭亭

蜀賓國黃金衣

筆管上鏤盧思道燕行

歌

拂菻國雕紫文馬腦如小合底寫國王名在上又

小貌亦類之 白玉劒長二尺餘

已上二十一物皆得其所自或經目識客有疑問悉
用條謹

說郛卷五十二下